

唐  
文  
拾  
遺

唐文拾遺卷之六十七

榮祿大夫三品頂戴前分巡廣東高廉道加四級臣陸心源輯

闕名 十五

唐舒論墓誌銘

論貫杭州鹽官縣靈泉鄉望出天水郡公諱敦父平  
論是平第二子時年廿有四以元和九年甲午歲十  
月十四日終于天長鄉內私舍以其月卅日葬於當  
縣西南四里買裴氏地安厝之禮也論未婚父平并  
兄弟等恐陵谷變遷桑田改移勒爲誌詞曰

青青松柏落落澗石蓬蒿里中長歛魂魄□閉泉門

千秋永隔

海昌  
備志

卷之十一

唐故國子律學直講仇君墓誌銘

并序

石諱道朗平陵人也門傳鼎鼎世襲簪衮享茅土於東齊光印綬於西漢曾祖周任驃騎大將軍簡州刺史蘊龍韜之秘略勇冠三軍當虎符之重寄化行千里祖絢隋任車騎將軍鷹揚即將材力過人雄傑槃世父詵唐任相國勅散大夫攀鱗附翼鳴珮鏘金君道稟自然智由天縱幼彰令問資孝友以基身長習文儒體仁義而成性珠明玉潤桂馥蘭芳兼以才辨有聞功能克劭拜騎都尉旣而志識甄明學藝該博亦婆娑於禮則復優游于憲典迺授宣德郎行國子監

律學直講雖環林璧水弘其待扣之材方領圓冠承  
茲鼓篴之致實以君道泰身否德尊位卑於是飛鴻  
歟翮窻聞漸陸之誼不謂棲鷺斂羽俄歎沈舟之酷  
以咸亨三年五月二日春秋五十有四終於京兆私  
第嗚呼幾傷埋玉更軫摧蘭雖振青徽於萬業而散  
形骸於一棺嗣子元暕通直郎幽州三水縣主簿上  
柱國悲深陟岵孝著循陔啓楹書而切慕瞻手澤而  
增哀夫人隋太常寺太醫令黃鸛之女也以萬歲通  
元二年五月廿六日合葬口京兆南高陽之原禮也隧  
路浮煙泉門少日嗟蒿里之宵眇聽松風之蕭瑟嗚

呼寸晷難常尺波易往  
方猷於立石銘懇勤于黃  
壤其銘曰

歲時不待□□□謝倏矣浮生  
非誠厚夜松檟森森  
泉臺宿宿首身莫贖千秋詎曉  
石

唐故承務郎試左武衛兵曹參軍攝無  
縣令

天水趙公墓志銘

并序

公諱全泰字全泰常山郡真定人也考諱融易定節  
度參謀□度營田副使朝請大夫檢校尚書兵部郎  
中兼御史中丞賜紫金魚袋上柱國公至學之歲曾

讀詩書冠帶之年留好文藏起家攝定州無極縣主簿再爲府掾五宰屬城事有始吉而終凶有前中而後否衣舟疏網限至難逃歿世之年五十有四時則大和四年十二月廿九日夫人隴西李氏宗正卿亳州刺史瀚之孫都水監丞穎王府參軍陝州夏縣丞邁之女晝哭毀聞有子二人長曰存序幼曰存成有女二人在室摧慕過禮以大和五年正月廿七日遷窆於州城西北七里翟村平原禮也貞而可久刻石銘之銘曰

奔曦轉側半西沈顧影知爲長逝心悲風撼撼吹原

野荆棘籠墳荒草深

常山貞石志

唐處士陸君墓志銘

處士諱曇字文廣其先吳郡人也祖諱光父諱朋處士幼承嚴訓長有令望風義洋洋遠近欽矚經學至美筆法尤精不仕明時邱園樂道視不讓善殲於哲人以開成元年寢疾至二年丁巳歲暮春之月四日終於私第春秋五十有二以茲年孟夏月廿一日終安厝於華亭縣南廿五里村號茆塔以平原新塋禮也處士娶吳氏生四子長曰行肅次顧師次杜老次稜婆悉以童稚之年而知孝弟恐時移代變林隴彫



推刻石刊甄永爲不朽銘曰

浮生寄世電影難留嗚呼良士埋沒荒邱魂氣兮歸  
天形體兮歸墓親戚兮悲傷兒女兮號訴

松江府志

唐故陳府君墓誌銘

府君諱環潁川人也祖興父道清並不求宦達君卽  
清公之第二子也幼著才識長閑規矩克言理行鄉  
閭所欽何圖天不佑善以會昌二年正月二十一日  
終於私第享年六十有三以當年八月十八日窆於  
蘇州海鹽縣東二十八里齊景鄉雅山南二里祖墳  
南舊塋禮也君娶吳郡顧氏有子三人長曰遂次曰

所損三曰公甫並至謙至讓忠乎孝乎泣血主喪絕  
漿逾制後恐月日久邁陵谷遷移刊石爲誌永傳不  
朽銘曰

山作田兮田作海萬古存兮誰不改青松新隴曉無

年千載惟留銘記在

嘉興府志

按此文據嘉興府志補缺文四十餘字

唐故陸氏廬江郡何夫人墓誌銘

并序

大唐會昌五年乙丑歲孟夏之月廿一日夫人終於  
家春秋六十有八祖諱眞父諱口口其先廬江人也  
夫人幼習女儀長有令譽初笄之歲匹于陸君肅肅

雍雍如琴如瑟嗚呼不同偕老陸君不幸而先逝夫  
人所生一子元慶幼而習禮頗識義方承順慈顏曾  
無怠色水漿不入杖立營葬以所卒之年莫秋之月  
乙巳朔廿六日庚午遷奉於華亭縣西北二十三里  
陸氏故山缺五字夫之兆以遵生前之命今慮歲月  
邈林摧隴隳刊碑立銘周表系以銘曰

嗚呼浮生如露如電平生玉容無由再見精魄缺四  
形體缺四慕鄉親子淚雨刻石散

米氏女墓誌銘

米氏九娘其先蓋□□□郡人也父諱寧米氏卽公

之室女貞淑溫□□家孝行幼女聰明

缺六和陸

□

內外親族無不欽傳愛敬立身閨室令則高門□禮  
於家孝行無比何期不幸邁疾卽以會昌六年□月  
五日終于揚州江陽縣布政里之□享年廿有一鳴  
呼長及笄年未娉待字從兄親弟泣血哀號六親悲  
切行過傷嗟卽以當月十九日殯于城東弦歌坊之  
平原禮也恐陵谷遷故刻貞后不朽焉銘曰

白日昭昭青松森森生死有限□明恨深朱顏永□

萬古傳今

十二硯齋金石錄

唐故劉府君墓誌并序

府君名舉彭城人也曾祖皋祖通父良三代並皆謂  
居清顯隱于丘陵府君承家禮讓立性溫和內外之  
親皆傳人孝充於四海朋友能賢何期不幸染疾累  
歲至於大中元年八月六日歿于江陽縣仁風坊之  
私第春秋□□夫人太原王氏有男一人名師貞女  
一人適于王君孤男孝女泣血號天卽以八月廿一  
日妥□嘉寧鄉五乍村之原府君在生壽祿兩榮先  
造其墓逝矣寘

下石  
缺刻

唐故右內率府兵曹參軍朱府君夫人南陽樊

氏誌銘

并序

序曰南陽之後軒冕開世最爲國內所稱曾祖釗皇  
明經出身泗州連水縣令夫人連水嫡女有兄一人  
早逝唯獨子立未登筭歲歸於吳郡朱氏二紀輔佐  
不幸居孀志在掬育悉知禮義皇天不祐大中四年  
七月廿日薨建業鍾浦之舊第春秋八十有一以其  
年歲次庚午十月乙巳朔十日甲寅合祔兵曹於鍾  
山之南善口里原禮也夫人遺息二人女二人長圓  
郎將仕郎前守淄州口水平縣尉次散郎拔眾敏利  
迴戰史口口曰先仰廿一娘適口口衛兵曹參軍琅  
邪王鑑廿二娘適前太常寺奉禮郎潁川陳口嗣子

等泣血號叩感而爲銘勒于貞石行焉銘曰

煒煒煌煌洎漢貽唐磊落軒冕連綿琳瑯令則和睦  
于何居孀提挈撫育厯饑經荒馮以積慶福壽無疆  
天不惠垂玉潤迴藏金爐歇艷寶鏡休光嗣子泣血  
孝女絕漿卜吉遷窆鐘領之陽楨柏森森永克嘉祥

古刻  
叢鈔

前長安縣尉楊籌女母王氏墓誌

王氏小字嬌嬌長號卿雲汴州開封人幼失怙恃鞠  
於二女兄之手長女兄以善音律歸于故相國盧公  
鈞卿因女兄遂習歌舞藝頗得出藍之妙宏農人初

以音律知遂用綵問於女兄唐咸通庚辰歲子月遂  
歸于楊氏未幾楊子以罪逆受天罰待死于長安萬  
年裔村曰庫谷王氏固非宜留將歸女兄堅不去願  
同疚于荒墅太夫人念其孝謹因許之寒暑三周備  
嘗茶蓼奉上和眾端貞柔淑在楊氏五年束如一日  
楊氏德其孝謹遂忘前所謂出藍之妙方思微霑俸  
祿且酬其勞不幸以甲申歲午月遭時癘姪且病盤  
餌有所妨故反豎得以成禍以其月四日誕一子子  
踰臘而終銘曰

父王母高兮作媵于楊始以音知兮終以行彰其家



千指兮劒戟鋒鋌處于其間兮卒無短長善非爲善  
兮天受其臧心雖猶面兮荼藜備嘗衣不暖體兮食  
不充腸歲月遲遲兮五周星霜人不堪憂兮卿不改  
康宜有豐報兮白首相將如何天奪兮二九其芳風  
露猶清兮日月猶光蘭薰玉潔兮不可弭忘

古誌  
石華

唐故□川于府君墓志銘

感君子之風履古人之道懷仁義以安禮樂立名節  
以善其始終者則有武原于府君焉君諱陽字予美  
曾祖副祖對父誼或潔身於高士或顯志於明時府  
君卽誼之第二子也幼敦孝弟長睦歸仁清聲旣高

求閒林園何曷靈芝見菱醴泉咸竭以咸通五年甲  
申歲五月十五日遘疾終於私第以六年乙酉二月  
二十日窆於縣西南卅里尙父鄉修化里通元寺西  
新塋禮也夫人太原孫氏承奉祭祀有女三人嗣子  
一人曰□行以仁孝親鄉黨以忠厚□□邦泣血增  
哀哀有餘禮女三人皆適名族□恐年逾代遠地谷  
遷移茹毒銜悲請爲□誌其銘曰

□□西□武原之域□葬其中以流其福□□□□

艸木朝肅將書永年日明胤育

常山貞  
石志

唐故湯府君墓誌銘

并序

君諱智其先范陽人也父湛湛之幼子也春秋六十  
有四咸通六年十二月十二日亡以七年三月八日  
葬吳縣胥臺鄉先買顧涓桑宅地□□顧弘朱從等  
建塋禮也有子二人長師藏次從□女一人正劉氏  
恐後無憑刊塋于□其銘曰

嗟乎湯君俄隨風燭一閉佳城千秋陵谷

石刻

唐梅□□墓誌銘

梅氏之地望在汝南府君之世業居海昌祖諱羅父  
諱慶皆遨遊時世遁跡邱園府君慶嗣子也未及弱  
冠泣嚔職遞厯眾局至於首統諸曹遊刃其間自後

頓懷高尚杳思退休□□千家條遷十稔乃迫知己  
薦□赭山未越月而政聞差効浙東鹽盜不踰年而  
盜伏法自是奸人懼反訟於公公自夏初雪濫一本作檻  
於越會廉察滎陽公鑒其冤尋與申白一本作聞上命未  
回而公遽疾奄然長逝春秋五十有四娶廬江何氏  
夫人君無賢嗣有女一纓及笄以咸通□年十二月  
廿五日歸窆於鹽官縣之昌亭鄉新建塋禮也爰勒  
貞珉求其不朽銘曰

□之□兮必摧玉之堅兮必缺魂之往兮不回□之  
逝兮永訣□之□兮□□隙之光兮電掣歎兮悼兮

泉扃是□

海昌備志

孫夫人墓志

唐咸通元年閏拾月拾伍日富春郡孫夫人從夫王氏之任潮州程鄉縣令時夫人遘疾歿于官舍享年四十七歲卜兆未利權設殯筵泊參年歲次壬午玖月拾捌日啟葬於廣州南海縣四望亭後崑慮陵谷變遷刻石紀爾

石刻

唐故河中府左果毅都尉高府君墓誌

君諱思溫字知柔渤海郡人也會祖筠試大常協律郎祖舉司農寺丞父建謀左清道軍府兵曹參軍君

娶夫人范氏不幸早歸大夜君以軋符三年四月十一日終雅俗坊以其年五月六日葬于江都縣興寧鄉趙墅里之原禮也享年四十七恐陵谷改移直書銘曰

哲仁君子忠孝於國家和六親有文有德直書其名以傳他日長歸蒿里萬古千□石刻

唐貞士韋君墓志

於嗟此有唐貞士韋君栖真之所也貞士諱士逸字士逸萬年杜陵人也舉進士釋褐爲赤縣尉不屑焉遂弃去躬耕南山家室睦如入其庭知其爲隱君子

韋爲京兆望姓纂冠累葉貞士獨澹如也不以門第  
相競於爭其謝傅之流亞歟中和四年七月貞士拚  
微疾喟然曰出不負乎君而死不違乎親生無裨于  
時而死不見譏于人其亦可矣以其月寢疾沒越三  
月葬于山中之白鹿坪以其配杜氏祔禮也於虞貞  
士往矣而貞士又無息千百年後陵谷迭口誰復知  
韋氏之有貞士乎爰略生平置諸墓門以誌貞士云  
刻石

梁故東海徐氏夫人墓誌銘

夫人卽節度右押衙鎮東軍副知客銀青光祿大夫

檢校國子祭酒左千牛衛將軍兼御史大夫樂君之  
冢婦也夫人曾祖諱□祖諱佐□嚴父皞見充鎮東  
軍觀察孔目官檢校工部尙書夫人以乾化四年七  
月六日遭疾奄逝享年四十以其年八月三日歸葬  
於鄆縣靈巖鄉金泉里禮也噫乎夫人稟嫺然之姿  
態實仙苑之桃李自和鳴鸞鳳竝顯令德而又柔順  
孝敬以奉姑嫜爲六親庭闈之則所謂神垂其祐天  
懋其喜孰知一旦遽罹凶□歸於窀穸夫人育一男  
光途年猶幼冲悲乎偏露所不忍睹嗚呼生也幻世  
沒兮歸人聊配馨香用標年祀銘曰



君之容止悉皆推先君之行義不辱移天蘭旣摧而

玉折日將遠兮時遷永刊貞□千年萬年

鎮海縣志

### 大唐故府君墓誌銘

維大周顯德元年歲次甲寅十二月辛丑朔二十日

庚申懷州武德縣缺州清河缺君諱缺供奉缺巡檢

使缺新婦劉氏新婦石氏嗣子長缺次男缺次姪永

興長男新婦李氏次男新婦□氏長女□□□次女

□□孫女子□姑次孫女子不憐次孫姪兒不秋缺

曾聞壽涯修短稟靈臺而□□其分缺千歲爲遙齡

郡路一□夫□爲促世蓋一至缺彭成郡劉氏夫人

忽□□席救療無詮何期不缺知身如缺它後雖缺

置墓缺南二里東南黃蘆缺射犬古城約三里缺河

口二里其塋地一□東至□□南至賈□西至□□

北至缺父業地缺妙冠缺龍虎缺子孫下刻石

王夫人墓誌銘并序

缺氏吳郡人也稟質貞缺五三從有義四德無虧缺

字三忽邁彌留日侵纏缺六正月八日終于缺五歲

次庚戌二月廿七缺六西北七里武邱山缺六二人

長子珣次子缺九恐陵谷變下缺古誌石華

大唐故冠軍大將軍代州都督上柱國許洛仁

妻襄邑縣君宋氏夫人墓誌并序

夫人諱善主字令儀定州安喜人也原夫玄禽翹羽  
□有尚之祚白翰騰驤肇承殷之祀洎平分邦錫祉  
□茂實於睢陽列國會盟秀芳華於官度祖逸周開  
府儀同三司江州刺史永甯縣開國公父濤隨左千  
牛備身永州長史柱國襲爵如故並位光烈宰名參  
上將褰帷楚甸副軫衡吳夫人名藹蘭閨聲絲閨壺  
標梅觀止櫟木承恩捧案申恭敬深饁野年過蒲柳  
歲迫桑榆遘疾彌流遊魂岱錄春秋九十有九薨於  
金城坊里第卽以其年五月廿四日窆於龍首原禮

也嗚呼哀哉松風悽慘薤露蒼茫悲夜臺之永暮痛  
佳城之未光乃爲銘曰

天開寶祚地啟靈源瑤華蔭蔚玉葉便繁偉哉先哲  
猗口後昆褰帷下邑露冕上藩其一四德標舉三從惠

養淑慎居貞聲名厲響口景西傾逝川東往瘞玉質

口重泉遂埋魂予幽壤其二  
其十二硯齋金石錄

毛藻墓誌銘

顓頊開源皋陶構緒門多俊傑代有文武萇卽演詩  
遂使威楚雲布簪猷星羅台輔偃蹇疏放志在追遊  
旣輕軒冕不重王侯夷齊作侶嵇阮爲儔滿堂嘲謔

孟鑄獻酬一生易盡百年難駐奄逐夜風俄隨朝露  
行旅傷感親友追慕隧道已通佳城將措黃泉路遠  
白馬悲深日慘春暖雲結郊陰草懸露泣樹引風吟  
式鑄貞琚永播芳音

廣平府志

唐故上騎都尉通直郎行永康令杜府君夫人

朱氏墓誌銘

并序

若夫桂曄松貞表恭姜之逸操蘭薰雪白彰孟光之  
閑雅寢地之訓無爽於幼年弄磚之儀有成於廿歲  
能兼之者實夫人之謂乎夫人朱氏卽榮之後也分  
官命族唐典邁於知人楊歷開基魏史光於進德父

琛才兼文武位列周行冀燹鹽梅將調鼎鼐夫人問  
名納禮適於杜氏之門承舅姑以敬恭事娣姒而柔  
順中饋酒食之禮幣帨榛栗之儀皆闡合於前經終  
可爲於後則不謂藏舟靡固陽劒先沈志負寒霜撫  
其孤藐每心歸向所以淨因虔仰六時匪虧一念知  
岸樹之非久識井籐之不堅豈積善之無徵忽遷神  
於大暮於是夜臺空掩遊月肆而無歸草露晨晞望  
雲衢而不返春秋七十有八嗣子君信泉樹多感樂  
棘有傷思答無由號天叩地卽以其年十一月廿五  
日葬於龍首原禮也白楊淒切素柳縈紛月旒繽翔

黃壚靜寂恐陵移海變冥漠無追敢勒翠琰式旌不朽  
銘曰

萊梁之妻夫人能似幼□令德實佐君子家襲冠紱  
名傳策史俄化一生溘焉萬祀其容駕晨裝哀歌曉  
徹庭醕告辭崩心厯而□□懷楚見之嗚咽恐音徽  
之寂寥庶揚芳於鏤碣石刻

唐王五從高叔祖易定等州缺上柱國李公故

夫人遼東榮下缺墓志

夫人諱尚卿其先遼東人下缺□□后妃之賢者故

慎氏下缺□□名振於義武軍三代下缺□柔和立

性婉順深有靜下缺 □□□尚容德也自作嬪君下

缺 □□□玉葉秀而芳陰多下缺 □□親禮樂之風

訓習下缺 □□□之祿華如桃李□下缺 □□近無

出其二美焉下缺 □□□而虧隨彼倉下缺 □□亟

九日終於定州博陵下缺 □□習禮次曰師周承天

下缺 □□□聞詩禮積習義下缺 □□不自勝歎鳴

鳳而□下缺 □□併請俸錢以喪事至下缺 □□夫

婦之道聿修承□下缺 □□安喜縣鮮虞鄉暉□下

缺 □□以□受命刊誌貞石用下缺 □美淑德夫人令

名惟桃之華下缺 □□□之原兮峩峩孤墳兮下

缺



常山貞  
石志

唐中岳沙門釋涵如禪師行狀

大師諱涵如姓王氏上黨人也幼隨舅任灋陽事青  
布明爲師年十九出家志求大法明內隱禪智當人  
見讓云蘄州忍禪師所行三昧汝宜往諮受曰敬聞  
命矣其後到彼會中稽請畢已祖師默辯先機卽授  
其道開佛密意頓入一乘數緣非緣二種都盡到清  
涼池入空寂舍可謂不動真際而知萬象者也天竺  
相承本無文字入此門者唯意相傳故廬山遠涵師  
禪經序云則是阿難曲承音詔遇非其人必藏之靈

府幽闕莫闕罕窺其庭如來泥曰未久阿難傳未田地未田地傳舍那婆斯此三應真冥契于昔功在言外經所不辯必闇軌元匠孱然無差又有達節善變出處無際晦名寄迹無聞無木斯人不可以名部分別有宗矣明者卽南天竺三藏法師菩提達摩紹隆此宗步武東鄰之國傳曰神化幽蹟入魏傳可傳榮榮傳信信傳忍忍傳如當傳之不言者非曰其人孰能傳哉至咸亨五年祖師滅度始終奉侍經十六載旣淮南化掩北遊中岳後居少林寺處眾三年人不知其量所以守本全朴弃世浮榮廉謙之德賢士

之靈也外藏名器內洽玄功庶幾之道高遁之風也  
對問辭簡窮精入微出有之計解空之圍也權智勇  
略能建汭城安人之友師者之明也垂拱二年四海  
標領僧眾集少林精舍請開禪法僉曰始自後魏爰  
降于唐帝代有五年將二百而命世之德時時間出  
威以無上大寶貽諸後昆今若再振玄綱使朝聞者  
光復正化師聞請已辭對之曰言寂則意不亡以智  
則慮未滅若順諸賢之命用隆先勝之道如何敢矣  
猶是謙退三讓久乃許焉觀乎至人之意廣矣大矣  
深矣遠矣今唯以一汭能令聖凡同入決定勇猛當

應諦受如人出火不容中斷眾皆屈伸臂頃便得本  
心師吹一印之沝密印於眾意世界不現則是沝界  
此沝如空中月影出現應度者心子勤行之道在其  
中矣而大化既敷其事廣博羣機隱變之度毫釐不  
差自後頻誨學人所疑咸速發問俄然現疾乃先覺  
有徵爾取後一夜端坐樹下告以遺訓重明宗極顯  
七日而爲一切悟彈指而震大千沝無去來延促思  
盡卽永昌元年歲次己丑七月二十七日午時寂然  
卒世春秋五十有二塋于少室山之原也諸受業沙  
門北就高頂起塔置石優填王釋迦像并累師之行

狀勒在佛碑冀夤奉廟庭觀文以自試曰我師利見  
動寂無方陶均萬累廣世爲梁登微有階庶勤必感  
遺功罔極日月齊光

十二硯齋  
金石錄

唐文拾遺卷之六十八

榮祿大夫三品頂戴前分巡廣東高廉道加四級臣陸心源輯  
新羅眞德女主勝曼

眞德新羅王善德之妹貞觀二十一年襲王永徽元年  
遣其姪春秋子法敏來朝織錦爲頌以獻五年卒  
贈開府儀同三司

太平頌

大唐開洪業巍巍皇猷昌止戈戎衣定修文繼百王  
統天崇兩施理物體含章深仁諧日用撫運邁時康  
幡旗何赫赫鉦鼓何鏗鏘外夷遺命者剪覆披天殃

滄風疑幽顯遐邇競呈祥四時和玉燭七曜巡萬方  
維嶽降宰輔維帝汪忠良五三成一德昭我唐家皇  
新羅文武王金法敏

法敏新羅王春秋子永徽元年入朝擢爲太府卿龍  
朔元年襲王以其國爲雞林州大都督府授法敏都  
督以納高麗叛眾略百濟地守之詔削爵發兵窮討  
上元中遣使入朝謝罪詔復官爵開耀元年死

赦教

往者國家間於兩國北伐西侵暫無寧歲戰士曝骨  
積於原野先王愍百姓之殘害越海請兵本欲平定

兩國雪累代之深恥全百姓之殘命百濟雖平高麗  
未滅寡人克承先志旣平兩敵四隅靜泰臨陣立功  
者並已酬賞但念囹圄之苦未蒙更新之澤可赦國  
內罪無大小悉皆放出百姓貧寒糶入米穀者待有  
年償之只還其母窮歎尤甚者子母俱免

東國  
通鑑

冊安勝爲高勾麗王詔

公之太祖積德立功子孫相繼開地千里年將八百  
至於建產兄弟禍起蕭牆釁成骨肉家國破亡宗社  
湮滅生人波蕩無所托心公避難山野投身隣國百  
姓不可以無主皇天必有以眷命先王正嗣惟公而



已主祭非公而誰謹遣金須彌山等冊命公爲高勾  
麗王公宜撫集遺民紹興舊緒永爲隣國事同昆弟  
敬哉兼遺粳米二千石甲具馬一匹綾五匹絹紬布  
各十匹綿十五稱

同上

### 遺詔

寡人運屬紛紜時當爭戰西征北討克定封疆伐叛  
招攜聿寧遐邇上慰宗祧之遺顧下報父子之宿寃  
自犯冒風霜遂成痼疾憂勞政教更結沉痾運往名  
存奄歸大夜太子早蘊离輝久居震位宗廟之主不  
可暫空太子卽於柩前嗣立且山谷遷貿人代推移

昔日萬幾之英終成一封之士徒費資財空勞人力  
屬績之後十日便於庫門外庭依西國之式以火燒  
葬服輕重自有常科喪制度務從儉約

同上

### 乞罪表

昔臣危急事若倒縣遠蒙拯救得免屠滅粉身糜骨  
不足上報鴻恩碎首灰塵何能仰酬慈造然深讎百  
濟逼近臣蕃告引天兵滅臣雪恥臣懼破滅自欲求  
存枉被凶逆之名遂入難赦之罪臣恐事意未申先  
從刑戮生爲逆命之臣死爲背恩之鬼謹錄事狀冒  
死奏聞伏願少垂神聽炤審元由臣前代以來朝貢

不絕近爲百濟再虧職貢遂使聖朝命將討罪死有  
餘刑伏惟皇帝陛下明同日月容光並蒙曲炤德合  
乾坤動植咸被亭毒好生之德遠被昆蟲惡殺之仁  
爰流翔泳倘降服捨之宥賜全腰領之恩雖死之年  
猶生之口非所希冀敢陳所懷謹遣原川等拜表謝  
罪伏聽勅旨兼進貢銀三百三十五兩銅三百三十  
兩針四百枚牛黃一兩二錢金一兩二錢四十綜布  
六匹三十綜布六十匹

同上

報薛仁貴書

我先王於貞觀二十三年入朝面奉太宗文皇帝恩

勅朕今伐高麗非有他故憐你新羅攝乎兩國每被  
侵陵靡有寧歲我平定兩國平壤已南百濟土地並  
乞你新羅永爲安逸新羅百姓具聞恩勅人人思奮  
大事未終文帝先崩今帝踐祚復繼前恩頻蒙慈造  
兄弟及兒懷金拖紫榮寵之極自古未有粉身碎骨  
望報萬一至顯慶五年聖上感先志之未終成曩日  
之遺緒命將徂征大發船兵先王年衰力弱不堪行  
軍追感前恩勉強至於界首遣其領兵應接大軍水  
陸俱進共平一國蘇大總管留漢兵一萬新羅亦遣  
弟仁泰領兵七千同鎮熊津大軍回後賊臣福信起

於河西收集餘燼圍逼府城先破外柵搃奪軍資復  
攻府城幾將陷沒又於府城側近四處作城圍守某  
領兵往赴以解其圍遂破賊城復運糧餉使一萬漢  
兵免虎吻之危至六年福信徒黨漸多侵取江東之  
地熊津留兵一千往攻兵敗匹馬不返自是熊津請  
兵日夕相繼遂發兵眾往圍周留城賊知兵小遂卽  
拒戰兵馬失利而歸南方諸城一時搃叛並屬福信  
福信乘勝復圍府城且絕熊津餉道卽募健兒間道  
救之至六月先王薨又承勅旨發兵北歸子在衰經  
不能應赴含資道摠管劉德敏等至奉勅令我國供

運平壤軍糧熊津劉摠管亦使來具陳府城孤危道  
斷糧盡遂共劉摠管攻拔瓮山開通道路若先運熊  
津恐違勅旨若專供平壤卽恐熊津絕糧所以差遣  
老弱運送熊津選簡精強擬向平壤其往熊津者在  
途遇雪人馬殆盡至龍朔二年正月劉摠管共我兩  
河道摠管金庾信等同運平壤軍糧風雪洄寒人馬  
凍死所將兵糧不能勝致大軍旣還我兵亦回飢凍  
死者不可勝數行至瓠瀘河麗兵來追我先渡河幸  
勝而還熊津府城頻索穀種前後所送數萬餘斛南  
運熊津北供平壤叢爾小國分供兩所人力疲極牛

馬死盡所貯倉庾坐見虛竭又留鎮天兵以時給衣  
都護劉仁願遠鎮孤城數被百濟侵圍我又遣兵解  
救天兵一萬衣食于我四年于茲國家恩澤雖復無  
涯新羅効忠亦足矜憫至龍朔三年摠管孫仁師領  
兵來救府城我兵亦發同至周留城下時倭人來助  
百濟兵船千艘泊于白沙百濟精騎陣于岸上我以  
驍騎先破岸陣周留失膽遂卽降下南方已定回軍  
北伐任存一城執迷不降我軍欲還杜大夫承勅欲  
與百濟共盟我謂百濟姦詐反覆百端今雖共盟後  
恐有悔奏請停盟至麟德元年復降嚴勅盟會之事

雖非所願不敢違勅乃於就利山築壇對勅使劉仁  
願歆血相盟山河爲誓畫界立對永爲疆界至乾封  
二年閏大摠管英國公征遼某往漢山州遣兵集於  
界首先遣細謀人覘候回言大軍未到平壤且攻七  
重城以待大軍其城垂陷英公使江深來云奉大摠  
管處分新羅兵馬不須攻城早赴平壤卽給兵糧遣  
令赴會行至水谷城聞大軍已回我亦遂來至乾封  
三年遣太監金寶嘉入海稟英公約束我來赴集平  
壤至五月劉石相來繼發兵馬同赴平壤某亦往漢  
城州點檢兵馬此時蕃漢諸軍摠集蛇水男建出兵



欲決一戰我兵獨爲前鋒先破大陣平壤城中挫鋒  
縮氣英公更取我國驍騎五百人先入城門遂破平  
壤克成大功我兵士並云征伐已經九年人力殫盡  
兩國之平今日乃成必當國蒙盡忠之恩人受効力  
之賞英公乃謂我軍前失軍期及其入朝反謂我兵  
無功又早尅之城本是我國之地陷於高麗三十餘  
年今還得之置官以守又以此城歸于高麗夫我國  
自平百濟迄定高麗盡忠効力不負天朝未知何故  
一朝見絕至總章元年百濟渝盟越境侵犯又致書  
云天朝修理戰艦外託征倭欲伐新羅至咸亨元年

六月高麗謀叛以殲留鎮朝官我欲發兵先報虢津云高麗既叛不可不伐百濟司馬禰軍來云發兵卽恐彼此相疑宜令兩國互相交質至七月入朝使金欽純等至將百濟舊地摠令割還曾未數年一與一奪我國臣民罔不失望去年九月具事奏聞遭風未達後百濟構讐誣我反叛前失貴臣之心後被百濟之譖進退惟谷未申忠欸使人琳潤至辱書仰承摠管犯冒風波遠來海外理須發使郊迎致其牛酒遠居異城未獲致禮披讀來書專以我國稱爲叛逆旣非本心惕然驚懼今略陳冤枉具錄無叛大陽雖不

回光葵藿猶懷向日摠管稟英雄之秀氣抱將相之高材天兵未出先問元由緣此來書敢陳不叛請加商量具狀申奏

同上

新羅宣德王金良相

良相始爲宰相建中四年新羅王乾運死國人共立之貞元元年冊爲檢校太尉鷄林州刺史兼海軍使

新羅王是年卒

據東國通鑑謂弒王自立

遺詔

寡人本惟菲薄居位以來年不順成民用困窮此皆德不符民望政未合天心常欲禪讓退居于外羣臣

每以誠止因循至今忽遭疾疹不寤不興死生有命  
顧復何恨死後依佛制燒火散骨東海

同上

### 新羅興德王金秀宗

秀宗憲德王母弟改名景微寶厯二年立大和元年  
冊爲嗣王開府儀同三司太尉雞林州都督如故開  
成元年卒

### 戒奢習教

人有上下位有尊卑名例不同衣服亦異俗漸澆薄  
民競奢華只尙異物之珍奇却嫌土產之鄙野禮數  
失於逼僭風俗至於陵夷敢率舊章以申明命苟或

故犯固有常刑

同上

新羅僖康王金悌隆

悌隆憲貞子唐開成元年立任在位三年被弑

遺詔

寡人以眇末之資處崇高之位上恐獲罪於天下慮  
失望於人夙夜兢兢若涉淵冰賴三事大夫白辟卿  
士左右挾維不墜重器今者忽染疾疹至於旬日慌  
惚之際恐先朝露惟祖宗大業不可無主軍國萬幾  
不可暫廢顧惟舒弗卹誼靖先王之令孫寡人之叔  
父孝友明敏寬厚仁慈久處台衡挾贊王政可以祇

奉撫育蒼生爰釋重負委之賢德付託得人夫復何  
恨伊爾多士竭力盡忠送往事居罔或違禮同上

新羅神武王金佑徵

佑徵元聖王孫開成四年立七月卒

拜張保皋鎮海將軍教

清海鎮大使保皋嘗以兵助神考滅先朝之臣賊其

功烈可忘耶

同上

新羅眞聖女主曼定

曼定康王女弟光啟三年立  
在位十一年禪位于太子  
曉

禪位上唐帝奏

居義仲之宮非臣素分守延陵之節是臣良圖臣姪  
曉年將志學器可與宗不假外求爰從內舉近已俾  
權藩寄用靖國災

同上

新羅景明王朴昇英

昇英神德王之子梁貞明三年立同光三年卒

有唐新羅國故國師謚真鏡大師寶月凌空之

塔碑銘

并序

余聞高高天象非維占廣闊之名厚厚地儀不獨稱  
幽元之號豈若栖禪上士悟法真人跨四大而遊化

觀風避三端而宴居翫月遂使假威禪伯歸魔□離  
亂之時追令法王扶釋教於昇平之際以至慈雲再  
蔭佛日重輝外道咸賓彌天率服持祕印而發揮奧  
旨舉元綱而宏闡眞宗唯我大師卽其人大師諱審  
希俗姓新金氏其先住邨王族草拔聖枝每苦鄰兵  
投於我國遠祖興武大王鼇山稟氣鯨水騰精握文  
符而出白相庭攜武略而高扶王室終平二敵永安  
兎郡之人克奉三朝遐撫辰韓之俗考孟相道高庄  
老志慕松喬水雲雖縱其閑居朝野恨其無貴仕妣  
朴氏嘗以坐而假寐夢得休□□後追思因驚有娠



便以斷其葷血虛此身心潛感幽靈冀生智子以大  
中九年十二月十日誕生大師異姿瞻發神色融明  
綺紈而未有童心齟齬而□□佛事聚沙成塔摘業  
獻香年九歲徑往惠目山謁圓□大師大師知有惠  
牙許栖祇樹歲年雖少心意尙精勤勞則高鳳推功  
敏捷則揚烏讓美俾踐僧□□離法堂咸通九年先  
大師寢疾乃召大師云此法本自西天東來中國一  
花啟發六業敷榮歷代相承不令斷絕我曩遊中土  
曾事百巖百巖承詞於江西繼明於南嶽南嶽則漕  
溪之冢子是嵩嶺之元孫雖信衣不傳而心印相授

遠嗣如來之教長開迦葉之宗汝傳以心燈吾什爲  
法信寂然無語自口洄口大師曰語悲深心喪愁切  
尤積亡師之慟實增絕學之憂十有九受具足戒旣  
而草繫興懷口飄託跡何勞跋涉卽事巡遊訪名山  
而仰止高山探口口而終尋絕境或問曰大師雖備  
遊此土遍謁元關而巡歷他方須參碩彥大師答曰  
自達摩付法惠可傳心禪宗所以口者何由西去貧  
道已口口目方接芳塵豈料捨筏之心猶軫乘桴之  
志文德初歲乾寧末年先宴坐於松溪學人雨聚暫  
栖遲於雪嶽禪客風馳何往不臧曷維其已眞聖大

卷六十八

士

王遽飛簪札徵赴彤庭大師雖猥奉王言而寧廢祖業以循途多梗附表固辭可謂天外鶴聲早達於雞林之畔人中龍德難邀於象闕之旁口因避煙塵歛離雲水投溟州而駐足託山寺以栖心千里又安一方蘇息無何遠聞金海西有福林忽別此山言歸南界及乎達於進禮暫以踟躕爰有口進禮城諸軍事金律熙慕道情深聞風志切候於境外迎入城中仍葺精廬諮留法軼猶如孤兒之逢慈父眾病之遇鑒王孝恭大王特遣政法大德如奐迴降綸言遙祁法力佐紫泥而兼送薰鉢憑專介而俾披信心其國主

歸依時人敬仰皆此類也豈惟肉身菩薩遠蒙聖□  
□尊青眼律師頻感羣賢之重而已哉此寺雖地連  
山脈而門倚牆根大師以水石探奇煙霞選勝驂遊  
西岫梟唳舊墟豈謂果宜大士之情深愜神人□□  
所以剏修茅舍方止葭輿改號鳳林重開禪□先是  
知金海府進禮城諸軍事明義將軍金仁匡鯉庭稟  
訓龍闕馳誠歸仰禪門助修窳所大師心憐□□意  
有終焉高演元宗廣揚佛道寡人祈膺丕構嗣統洪  
基欲資安遠之風期致禹湯之運聞大師時尊天下  
獨步海隅久栖北岳之陰請授東山之法輿輪寺上

座釋彥琳中事省內養金文式卑辭厚禮至切嘉招  
大師謂眾云雖在深山屬於率土况因付囑難拒王  
臣貞明四年冬十月忽出門屈於□輦至十一月四  
日寡人整其冕服稍淨襟懷延入藥宮敬邀蘭殿特  
表師資之禮恭申鑽仰之儀大師高拂毳衣直昇繩  
榻說理國安民之術敷歸僧□□之方寡人喜仰慈  
顏親聞妙旨感激而重重避席忻歡而一一書紳此  
日隨大師上殿者八十人徒中有上足景質禪師仰  
扣鐘鳴潛迴鏡智大師撞擊聲在春容曉日之映羣  
山清風之和萬籟縱容演法偏超空有之邊慷慨譚

禪實出境塵之表莫知其極誰識其端翌日遂命百  
寮詣於所止同列稱曰仍差高品上尊號曰法膺大  
師此則盡爲師表常仰德尊恭著鴻名以光元教其  
後大師已歸舊隱重啟芳筵諭諸學於道灰俱傳法  
要援羣生於塗炭口贊慈風則必忽患微疴猶多羸  
色大眾疑入兩楹之夢預含雙樹之悲龍德三年四  
月二十四日詰旦告眾曰諸法皆空萬緣俱寂言其  
寄世宛若行雲汝等勤以住持慎無悲哭右脅而臥  
示滅於鳳林禪堂俗年七十僧臘五十於時天色靄  
氤日光慘澹山崩川竭草悴樹枯山禽於是苦啼野

獸以之悲吼門人等號奉色身假煆於寺之北嶺寡人忽聆遷化身惻慟情仍遣昭元僧榮會法師先令弔祭至於三七特差中使賁送賻資又以贈謚眞鏡大師塔名竄月凌空之塔大師天資惠悟嶽降精靈懸慈鏡於靈臺挂戒珠於識宇於是隨方宏化逐境示慈知無不爲綽有餘裕至於終世心牢無暫起之情雖在片時體正絕塵勞之染傳法弟子景質禪師等五百餘人皆傳心印各寶髻珠俱栖寶塔之旁共守禪林之間遠陳行狀請勒貞珉寡人才謝凌雲學非對口柔翰敢揚其禪德菲詞希播其道風遽裁熊

耳之銘焉慙梁武追製天台之偈不媿隨皇其詞云  
釋迦法付大龜氏十劫流轉示後來心滅法流何日  
絕道存人去幾時迴傳矣哲人憂迷路生於浮世降  
聖胎慈海波高橫一葦邪山路險軫三材方忻宴坐  
銀花發忽歎泥洹寶月摧霜霑鵲樹悲長悴霧暗雞  
山待一開龍德四年歲次甲申四月一日建

新羅敬順王金傳

傳孝宗之子爲甄萱所立唐天成三年立在位八年  
降于高麗

上高麗王建書



本國久經亂離歷數已窮無復望保基業願以臣禮

見

東國通鑑

金庾信

庾信舒玄子官上州將軍梁州都督征西大將軍平  
百濟滅高句麗皆其功卒年七十九追贈王爵

中嶽告天誓詞

敵國無道侵擾我封疆略無甯歲一介微臣不量材  
力志清禍亂惟天降監假手於我同上

祭落星文

天道則陽剛而陰柔人道則君尊而臣卑苟或易之

卽爲大亂今毗曇等以臣而謀君自下而犯上此所謂亂臣賊子人神所同嫉天地所不容今天若無意於此而反見星怪於主城此臣所疑惑而不喻者也惟天之威從人之欲善善惡惡無作神羞同上

薛聰

聰字聰智博學善屬文能以方言解九經義訓導後生

諷羅王文

唯臣聞昔花王之始來也植之香園護以翠幕當三春而發艷凌百花而獨出於是艷艷之靈天天之英

無不奔走上謁忽有一佳人名曰牆薇朱顏玉齒鮮  
粧靚服伶俜而來綽約而前曰妾聞王之令德願薦  
枕於香帷王其容我乎又有一丈夫名曰白頭翁布  
衣韋帶戴白持杖龍鍾而步偃僂而前曰僕在京城  
之外居大道之旁竊謂左右供給膏粱雖足巾衍儲  
藏須有良藥故曰雖有絲麻無棄菅蒯不識王亦有  
意乎王曰丈夫之言亦有道理而佳人難得將如之  
何丈夫曰凡爲君者莫不親近老成而與昵比天艷  
而亡然而天艷易合老成難親是以夏姬亡陳西施  
滅吳孟軻不遇以終身馮唐郎潛而皓首自古如此

吾其奈何花王謝曰吾過矣

同上

### 金弼奚

弼奚官翰林郎朝散大夫兼太子朝議郎

### 聖德大王銅鐘之銘

夫至道包含於形象之外視之不能見其原大音震動於天地之間聽之不能聞其響是故憑開假說觀三眞之奧載懸舉神鐘悟一乘之圓音夫其鐘也稽之佛生則驗在於蜀膩尊之常鄉則始制於鼓延空而能鳴其響不竭重爲難轉其體不褻所以王者元功克銘其上羣生離苦亦在其中也伏惟聖德大王

德共山河而並峻名齊日月而高懸舉忠良而撫俗  
崇禮樂而觀風野務本農市無濫物時嫌金玉世尙  
文才不意子虛有心老誠四十餘年臨邦勤政一無  
干戈驚擾百姓□□四方鄰國萬里歸賓惟有欽風  
之望未曾飛矢之窺燕秦用人齊晉替霸豈可並輪  
雙轡而言矣雙樹之期難測千秋之夜易長宴駕已  
來於今三十四年也頃者孝嗣景德大王在世之日  
繼守丕業監撫庶機早隔慈規對星霜而起戀重違  
嚴訓臨闕殿而增悲追遠之情轉悽益魂之心更切  
敬捨銅一十二萬斤欲鑄大鐘一口立志未成奄爲

就世今我聖上行合祖宗意符至理殊祥異於千古  
令德冠於當時六御龍雲蔭洒於玉階九天雷鼓震  
響於金闕草木之林離離乎外境非煙之色煥煥乎  
京師此則報茲誕生之日應其臨政之時也仰惟大  
君恩若地平化黔黎於仁教心如天鏡獎人子之孝  
誠是知朝於元舅之賢夕於忠臣之輔無言不擇何  
行有懋乃願遺言遂成宿意爾其有司辨事工匠盡  
模歲次大淵月惟大呂是時日月借暉陰陽調氣風  
和天靜神器化成壯如嶽立聲若龍吟上徹於有頂  
之巔潛通於無底之下見之者稱奇聞之者受賜願

茲妙因奉翊尊靈聽普聞之清響登無說之法筵契  
三明之勝心居一乘之眞境乃至瓊萼之叢共金柯  
以永茂邦家之業將鐵圍而彌昌有情無識慧海同  
波咸出塵區並昇覺路臣弼奚文拙無才敢奉聖詔  
貸班超之筆隨陸佐之言述其明旨銘記於鐘也其  
詞曰

紫極懸象黃輿啟方山河鎮別區宇分張東海之上  
眾仙所藏地居桃壑界接扶桑爰有我國合爲一鄉  
元元聖德曠代彌新妙妙清化遐邇克臻將恩被遠  
與物均霑茂矣千葉安乎萬倫愁雲忽脫慧日無春

恭恭孝嗣繼業於機治俗仍古移風豈違日思嚴訓  
常慕慈輝更以修福天鐘爲祈偉哉我后盛德不輕  
寶瑞頻出靈符每生主賢天佐時泰國平追遠惟勤  
隨所願成乃願遺命于斯寫鐘神人獎力珍器形容  
震威鳴谷清韵朔峯聞見俱信芳緣允鍾能保魔鬼  
救之魚龍圓空神體方現聖蹤永是鴻福恆恆轉重  
大厯六年歲次辛酉十二月十四日鑄鐘

金陸珍

陸珍官守大南令元和四年入唐朝貢使

唐鑒藏寺碑



守大南令臣金陸珍奉

缺考

有測記予若存者教亦

善數歸于九

有缺

以雙忘

缺

而不覺遍法界而冥立

有缺

是微塵之剎沙數之區競禮微言爭尙

有缺

能與於此

乎鑒藏寺者

缺二字

迴絕累以削成所寄冥奧自生虛

白碧澗千尋中宮奉爲

有缺

明業繼斷鼇功崇御辨運

璇璣而照寓德合天心握金鏡

有缺

何圖天道將變書

物告凶享國不永一朝晏駕中宮

有缺

身內極而喪禮

也制度存焉必誠必信勿之有悔送終之事密藏鬱

陶研精寤寐求之思所以幽贊冥休光啟元福者西

方府之紆財召彼名匠各有司存就於此寺奉造阿

彌陀佛像一見真人於石塔東南崗上之樹下西面

而坐爲大眾說法既覺

有缺

巉崿溪澗激迅維石巖巖

山有朽壤匠者不顧咸謂不詳乃

有缺

之固正當殷立

有若天扶於時見者愕然而驚莫不

有缺

至百慮多岐

一致於誠誠也者可以動天地

有缺

既得匪棘其欲子

來成之其像則

下缺

右第一石

上也當此之時豈

有缺

基壤之剔之更將

有缺

歟是歟故

知萬法殊

有缺

什之材畢至班石之巧

有缺

普照八十種

好出眾妙

有缺

鋪綺檻朝日暎而炫耀

有缺

苦節潔行修

身專思法

有缺

德貞順立節著於稱道

有缺

路若斯之盛

乎欲比有缺燕然之作便察膺揚有缺物混成載我以形

勞我有缺慧炬用拯迷類正教難測有缺龍業泰登樞位

襲聲教有缺忘不忘維何思崇冥祐有缺緇紛散香花周

繞天人下缺右第  
二石

金力奇

力奇元和三年新羅入朝貢使

請授故主俊邕封冊歸國表

貞元十六年奉詔冊臣故主金俊邕爲新羅王母申

氏爲太妃妻叔氏爲王妃冊使韋丹至中路知俊邕

薨其冊却迴在中書省今臣還國伏請授臣以歸唐會

要九  
十五

金柱弼

柱弼長慶二年新羅國朝貢使

請牒傍海州縣任新羅良口歸國奏

先蒙恩勅禁賣良口使任從所適有老弱者栖栖無  
家多寄傍海村鄉願歸無路伏乞牒諸道傍海州縣  
每有船次便賜任歸不令州縣制約

唐會要  
八十六

金穎

穎官守定邊府司馬朝請郎

新羅國武州迦智山寶林寺謚普照禪師靈塏

碑銘

聞夫禪境元寂正覺希夷難測難知如空如海故龍  
樹師子之尊者喻芭蕉於西天宏忍惠能之祖師譚  
醍醐於震旦蓋埽因果之跡離色相之鄉登大牛之  
車入罔象之域是以智光遠照惠澤遐流灑法雨於  
昏衢布慈雲於覺路見空者一息而越彼邪山有爲  
永劫而滯於黑業矧乎末法之世像教紛紜罕契眞  
空互持偏見如擘水求月搓繩繫風徒有勞於六情  
豈可得其至理其於眾生爲舍卽舍卽爲眾生眾生  
不知在舍卽法界之中縱橫造業舍卽亦不知眾生

在苞舍之內湛然常寂豈非迷耶如此迷者大不迷  
矣知其迷惟我禪師乎或謂此說爲濩落之言吁道  
經云上士聞道崇而奉之中士聞道撫掌而笑不笑  
不足以爲道也此之謂矣禪師諱體澄宗姓金熊津  
人也家承令望門襲仁風是以慶自天鍾德從嶽降  
孝義旌表於鄉里禮樂冠蓋於軒裳者也禪師託體  
之年尊夫人夢日輪駕空乘光貫腹因之驚悟遂覺  
有懷及逾朞月不之誕生尊夫人追尋瑞夢誓禱良  
因膳徹股脩飮斷醪醴胎訓淨戒臨事福田由是克  
解分蓐之憂允叶弄璋之慶禪師貌雄嶽立氣潤河

靈輪齒自然金髮特異閭里聲歎戚口咸驚從襁褓之年宛有出塵之趣登齟齬之歲永懷捨俗之緣二親知其富貴難留財色莫繫許其出家遊學策杖尋師投花山勸法師座下聽口爲業握衣請益夙夜精勤觸目無遺歷耳必記常以口治麤鄙藻練僧儀積仁順而煩惱蠲除習虛靜而神通妙用超然出眾卓爾不羣後以大和丁未歲至加良峽山普願寺受具戒一入壇場七宵行道俄有異雉忽爾馴飛有稽古者曰昔向陳倉用顯霸王之道今來寶地將興法主之徵者焉初道儀大師者受心印於西堂後歸我國

說其禪理時人雅尙經教與習觀存神之法未臻其  
無爲任運之宗以爲虛誕不之崇重有若達摩不過  
梁武也由是知時未集隱於山林付法於廉居禪師  
居雪山億聖寺傳祖心闢師教我禪師往而事焉淨  
修一心求出三界以命非命以軀非軀禪師察志氣  
非偶素概殊常付元珠授法印至開成二年丁巳與  
同學眞育虛會等路出滄波西入華夏參善知識歷  
三五州知其法界嗜欲共同性相無異乃曰祖師所  
說無以爲加何勞遠適止足意興五年春二月隨平  
盧使歸舊國化故鄉於是檀越傾心釋教繼踵百川



之朝鼇壑羣領之宗鷺山未足爲喻也遂次武州黃  
壑蘭若時大中十三禩龍集於析木之津憲安大王  
卽位之後年也大王聆風仰道勞於夢魂願闢禪扉  
請入京轍夏六月教遣長沙縣副守金彥卿賁茶藥  
迎之所以處雲巖之安兼屬結戒之月託淨名之病  
陳六祖之辭冬十月教又遣道俗使雲巖郡僧正連  
訓法師奉宸馮瑄等宣諭綸旨請移居迦智山寺遂  
飛金錫遷入山門其山則元表大德之舊居也表德  
以法力施於有政是以乾元二年特教植長生標柱  
至今存焉宣帝十四年仲春副守金彥卿夙陳弟子

之禮嘗爲入室之賓減清俸出私財市鐵二千五百斤鑄盧舍那佛一軀以莊禪師所居梵宇教下望水里南等宅共出金一百六十分租二千斛助充裝飭功德寺隸宣教省咸通辛巳歲以十方施資廣其禪宇慶畢功日禪師蒞焉虹之與蜺貫徹堂內分輝耀室渥彩燭人此乃堅牢告祥娑迦表瑞也廣明元年三月九日告諸依止曰吾今生報業盡就木兆成汝等當善護持無至隳怠至孟夏中旬二日雷電一山自酉至戌十三日子夜上方地震及天曉右脅臥終享齡七十有七僧臘五十二於是弟子英惠清奐等

八百餘人義深考妣情感乾坤追慕攀號聲動溪谷  
以其月十四日葬於王山松臺壘塔安厝嗚呼禪師  
名留於此魂魄何之生離五濁超入八空樂寂滅而  
不歸遺法林而永秀豈惟濟生靈於沙畝實亦裨聖  
化於三韓禮云別子爲祖康成注云子若始來在此  
國者後世以爲祖是以達摩爲唐第一祖我國則以  
儀大師爲第一祖居禪師爲第二祖我師爲第三祖  
矣中和三年春三月十五日門人義車等纂集行狀  
遠詣王居請建碑銘用光佛道聖上慕真空之理闡  
嚴師之心教所司定謚曰普照塔號彰聖寺額寶林

褒其禪宗禮也翌日又詔徵臣修撰碑讚垂裕後人  
臣兢惶承命直筆爲詞但以供奉宸衷敢避文林嗤  
哂詞曰

禪心不定兮至理歸空如活琉璃今在有無中神莫  
通照兮鬼其敢衝守無不足兮施之無窮劫盡恆沙

兮妙用靡終

其一

寥廓含卮苞育萬物蠢蠢眾生違舍

卮律律旣罔體復誰是佛迷之又迷道乃斯畢

其二

大

哉禪師生乎海域克鍊菩提精修惠德觀空離空見

色非色強稱爲卽難名所得

其三

有爲世界無數因緣

境來神動風起波翻須調意馬勤伏心猿以斯爲寶

施於後賢

其四

乘波若舟涉愛河水彼岸既登惟佛是

擬牛車已到火宅任燬法相雖存哲人其萎

其五

叢林

無主山門若空錫放眾虎鉢遺羣龍惟餘香火追想

音容刊此真石祀法將雄

其六

中相四年歲次甲辰季

秋九月戊午朔旬有九日丙子建

金口口

闕名

新羅文武王陵之碑

上

後兵殊配天統物豎野經圻積德口口匡時濟難

應神

缺

靈命

缺

派鯨津氏映三山之闕東拒閑梧之

境南鄰口桂之口口接黃龍駕朱蒙

缺

承白武仰

缺

間盡善其能名實兩濟德位兼隆地跨八夤勳超三

□巍巍蕩蕩不可得而稱者我新羅缺君靈源自質

繼昌基於火官之后峻構方隆由是克□□枝載生

英異稔侯祭天之脄傳七葉以缺焉十五代祖星漢

王降質圖穹誕靈仙岳肇臨□□似對玉欄始蔭祥

林如觀石紐坐金輿而缺大王思術深長風姿英拔

量同江海威若雷霆□地□□方卷跡停烽罷候

萬里澄氛克勤開缺簡□之德內平外成光大之風

邇安遠肅□功盛□□於將來疊粹凝貞垂裕於

後裔缺挹□舍謙乃聖哲之奇恩以撫人寬以御物

字缺四知其際承德者咸識其鄰聲溢間河缺峯而疎

幹契半千而誕命居得一以□□照惟幾於丹府義

符性與洞精鑒缺恬□輔質情源湛湛吞納□□襟

字缺六握話言成範容止可觀學綜古缺之訓姬室拜

橋梓之缺大唐太宗文武聖皇帝應鴻祉缺宮車晏

駕遏密在辰以缺舜海而霑有截懸堯景以燭無垠

缺著□□□而光九列掌天府以缺感通天使息其

青蘋安然利涉缺近遼鄰好頻行首鼠之謀外信缺

熊津道行軍大總管以君王缺列陣黃山蜩聚鳴張

欲申距缺至賊都元惡泥首轅門佐吏缺三年而已

至龍朔元年缺所寶惟賢爲善最樂悠仁缺朝野懽

娛縱以無爲無缺覲更興太伯之基德缺之風北接

挹婁蜂缺詔君王使持節缺軍落於天上旌缺之謀

出如反手巧缺丸山有紀功之將以缺眞九合一匡

東征西缺宮前寢時年五十六缺牧哥其上狐兔穴

其傍缺燒葬卽以其月十日火缺妣天皇大帝缺王

禮也君王局量缺國之方勤恤於八政缺歸乃百代

之賢王寔干缺清徽如士不假三言識駿缺而開沼

髣髴濠梁延錦石以缺之賓聆嘉聲而霧集爲是朝

多缺卽入昇忘歸射熊若返太子雞缺丹青洽於麟



閣竹帛毀於芸臺缺餘下拜之碣迺爲銘曰

缺侍星精缺域干枝延照三山表色盛德遙傳缺道

德像棲梧缺允武允文多才多藝憂人吞蛭尊缺九

伐親命三軍缺威恩赫奕茫茫沮滅聿來充役蠢缺

欽風丹雘屢出缺鎮空缺雄赤鳥呈灾黃熊表崇俄

隨風燭忽缺命凝真貴道賤身欽味釋缺葬以積薪

缺滅粉骨鯨津嗣主允恭因心孝友罔缺鴻名與天

長兮地久

闕名

新羅鏡文

三水中四維下上帝降子於辰馬先操雞後搏鴨此  
謂運滿一三甲暗登天明理地遇子年中興大事混  
蹤跡沌名姓混沌誰知真興聖振法雷揮神電於已  
年中二龍見一則藏身青木中一則現形黑金東智  
者見愚者盲興雲注雨與人征或見盛或視衰盛衰  
爲滅惡塵滓此一龍子三四遞代相承六甲子此四  
維定滅丑越海來降須待酉此文若見于明王國秦  
人安帝永昌吾之記

高麗史